

AN SPIAGL

I ber enk kontarn drai gschichten va drai vicher

Mòcht enk nèt derbischn de sai' ècht, sicher!

An skiratt, an horjoch ont a kòtz

Òlls passt, an iatn sòtz!

DER SKIRATT

S krèsplt, s nacklt, s kurlt, s ziacht

Ont s geat òlbe keing en liacht

Asou hom se an gahoasn òlbe der òrm kloa'

Benn as van bòlt ist er kemmen zua.

Timbl hòt er gahoasn ont s ist gaben an skiratt

Do untn mecht er sechen der sai' letrat.

Der ist gaben asou gamiatlech, liable ont linn

A vi as hat gabellt hom òll kinn.

Ober za sai' za liab mias men pasn au za nèt vòlln en an lòtz,

bavai an scheilen to der Timbl ist kemmen pòckt van a kòtz.

Schbòrz, znicht pet groubes hor ont spitzega zenn

Hòt se en maul ganòmme s skriattl abia bes baret a henn!

Zittret, pet en hèrz as ist gaben abia a glock

De sèll znicht kòtz hòt an trong unter an stock.

De hòt gebellt vort trong der Timbl

Ober a hilf zan an glick ist kemmen van himbl!

An horjoch pet baisa ont kafèvòrbega vedern ont an geln tschòtt

Ist unterkemmen ver za hèlven en sai' òrm kamaròtt.

Zboa rascher ont a gapècka as en kopf, ver za sechen nea'mmer de sèll kòtz

Vort va sem ont gahassee ausen van sèll plòtz.

Der Timbl ist bider gaben vrai za laven, za krèspln

Ont um en sai' bòlt en de òndern vicher, za bispln.



DE KÒTZ

De kralt, de hatscht se, de bolgt se as de eart

En de hint schaukt se verkeart.

Asou hom sa kontart va de kinegen van haus

Benn va de tir ist se gòngen anaus.

Mira hòt se gahoasn ont s ist gaben de
schea'nest van kòtzn

Gònz schbòrz pet gela ang ont dicka pròtzn.

De ist gaben an gaschenk ver a tichtega
tochter van schmi'

Zan earstn hom s en gearn gabellt ont de hom
sa gahòltn unter en sai' kami'

Ober men boas, sèll as pfòllt hait

Nèt òlbe ist mornng derlait.

An ònders vi hòt gabellt s diarndl òlls en a
vòrt

S skirattl van bòlt, ober ver za hom s ist gaben
hòrt!

Asou linn, kloa' ont bill

Ont sias abia a marill.

De Mira ist loade gaben, nea'mmer gahatscht

Ont araus van haus gaborven bail as dratscht.

S hor ist pòtzlet kemmen der hunger òlbe
mear

Bavai en haus s katzl hòt nea'mer gamecht
ea'r.

Ober an to a liacht en kopf ist se u'kentn

Trong en diarndl s skirattl ont kemmen
kamaròtn

Ont en an blitz unter an òst ber as men secht..

S skirattl! gonz aloa' "do geat s tschlècht"!

Padabumf ont en an rustsch pahenn

Der Timbl ist gaben mitt en de zenn!

Laf pahenn hoa'm kann kinn

Ver za trong en s sèll vi asou linn.

Ober òlls en a vòrt va oum ist kemmen der
kine van himbl

Ont pet sai'na kraln hòt er gaholven der òrm
Timbl.

Pet en schbònz mitt en de tschòtn de kòtz


Ist bider dahoa'm keart en sai' plòtz!

S diarndl za sechen s òrm katzl gònz plaziart

Hòt s en òrm ganommen ont hòt s kuriart.

Van sèll to de Mira ont s diarndl sai' gaben
abia paru' ont messer

Men boas, bes men hèlft mitt ont men steat
zòmm ist òlbe pesser!



S HORJOCH

S vludert, s bòcht, s hiatet, s pèckt
S spilt, s schòfft ont s vrèsst.
Asou hom sa òlbe tsechen der kine van himbl
As hòt galept en pèrg nem en Hardimbl.
Der sai' num nea'met vrokt ont nea'met boas
Der sèll horjoch ist gaben stòrch, schea' ont groas.
Va oum hòt s tsechen de gònze bèlt
S hòt gaheart bòrm oder de kelt.
S horjoch hòt òlbe òlls tsechen ont òlls gabisst
Ont hòt en òlla gaholven, umansist.
En de leistn zaitn hòt s embort de schbòrz kòtz
As ist umadum gòngen en sèll plòtz.
De ist gaben loade ont gònz nòss
Araus gaborven van bòrm haus en a tunkla gòss.
Hunger hòt se nèt gahòp, ober de hòt òlbe tsuacht
Eppes en bòlt bou as hòt koa' liacht.
Ont der sèll to as s kloa' skirattl ist gaben en lòtz
S horjoch ist unten gòngen za pèckn en de kòtz!
Der Timbl ist vort galaft ont de kòtz bider umkeart
Dahoa'm pet en sai' diarndl nem en heart.



*Sèll as rift guat ver peada de vicher va de doi gschicht
Lògt verstea' as nèt òlbe oa'n ist guat ont der ònder ist znicht.
Bes men lest de gschicht va òlla de saitn
Verstat men as òlla sai' engln ober aa taivln!
Liab leser, an iats kontart sèll as ar lept
Hòlt an spiagl en de hònt de doi ist de richtege rezept !
Schau drinn, ober aa tschenket ont garècht
Lisn òlla ober schaug schea'ont tschbinn nia tschlècht!*